



## STINAPA TA INFORMA

ZOYA PAL'I KOKO, ZOYA

Bo mester a yega di wak'é durante un di bo buelonan interinsular. Surienne Bernabela (30), e stiwardès simpátiko di DAE. Promé ku esei el a studia un par di aña na e prestigioso HBO TIO na Hulanda pa bira 'hostess' den diferente ramo di aktividad. Despues el a laborá komo stiwardès pa vários aña na Oropa. Na 2002 Surienne a regresá Boneiru. Pa Surienne nos tur mester atendé ku naturalesa na un forma responsabel. Esei ta enserá manten'é limpi i nèchi. Durante Surienne su biahenan e por a kompará basta otro pais i isla ku Boneiru. I un kos ta resaltá sigur: kon limpi Boneiru su naturalesa ta. Kisas tin otro pais mas riku na bienes pero sigur nan no ta mas limpi ku Boneiru. Esaki ta un di e motibunanan ku ta hasié orguyoso di Boneiru su naturalesa. P'esei tambe e ta sostené akshonnan di limpieza di diferente organisashonnan. Surienne ta keda atraé pa laman i en partikular pa e pal'i kokonan. Su lugá faborito ta Playa Pal'i Lechi. Aki e por drumi lesa, reflehá i wak avionnan subi i baha. E ta disfrutá inmensamente di e bahada di solo na e playa aki. Hopi biaha e no ta tuma e inisiativa pa landa pero ta djis sinta i disfrutá di e esenan bunita aki. Un otro lugá ku e ta konsiderá su lugá faborito ta Washington Park. E ta realisá, spesialmente fo'i punto di bista di su profeshon, kon importante naturalesa ta pa e industria turístiko i asina outomátikamente pa e ekonomia boneriano. E ta splika ku for di ora e turista yega Boneiru te ora e sali, e isla ta generá entrada. Sin turismo, Boneiru lo no tin suficiente entrada. Mayoria biaha Surienne sa puntra e turista, durante su trabou, e motibu di su bishita na Boneiru. Tur ta kontestá sin eksepsion ku ta p'e laman, buseo i naturalesa. I nan ta konta otro ora nan yega nan pais bèk. Zoya pal'i koko, zoya. Kisas Surienne a skucha e kantika aki hopi komo mucha i esaki lo ta un di e motibunanan di su stimashon pa e palu aki. Un kos si ta sigur: e ta pidi nos tur pa sigui mantené e playanan i nan pal'i kokonan mesun bunita i limpi. No pa turistanan so sino tambe pa nos ku ta biba aki por sigui disfrutá di nan. *Skirbi pa Natalie Wang.*

Pa mas informashon i reakshon: STINAPA, telefon 717 - 8444, [info@stinapa.org](mailto:info@stinapa.org)

## NOS TA BIBA DI NATURALESAS



**Traha huntu na un desaroyo duradero pa Boneiru**